

真愛

——記人格者謝緯醫師

佇 Formosa 台灣，在來醫生踮社會上就特別受一般人欣慕儉敬重，因為醫生是一款地位儉財富的象徵。世俗的序大苦袂得家己的囡兒序細會當成做醫生，趁錢若趁水，一世人榮華富貴，致蔭規家大細，予鄉里呵啫比大頭拇。

不而過，世間總是有極其少數的人格者無為名、無為利，做別人無愛做的工課，行別人袂癮(giàn)行的路。親像「台灣新文學之父」賴和(1894-1943)先，就是會予我比大頭拇的第一個人選；伊毋但佇日本人的天年，以文學創作儉參與社會、政治運動對抗統治者倚旗造反，尚且，佇伊的本業醫生做了閣較會起，伊定定佇咱人 29 暝，共一冬來散良人所欠的數單放火燒掉，按呢做，毋但燒掉伊的收入，閣較燒出人格者的光輝，莫怪會予當地鄉親尊稱做「彰化媽祖」。另外，予人號做「烏跤病患之父」的王金河(1916-2014)醫師，嘛聽好講是一位典型的人格者，伊無掛意世俗的名利，儉牽手毛碧梅女士規心照顧北門、學甲、布袋、義竹四個鄉鎮生「烏焦蛇」的烏跤病患者；伊毋但親手為個鋸腳，拄著患者空喙流 siōnn 生蟲，伊全款好禮仔共蟲撓(ngiáu)出來，減輕患者的痛苦，甚至閣進一步偕行動無利便的患者去換藥仔儉做禮拜，這款疼心世間少人有；伊的故事後來予人寫做小說〈一隻烏仔哮啾啾〉，嘛改編做影戲，得著不止仔濟的嘆仔聲。

儉王金河醫師同(tâng)年，相 siāng 出身東京醫大的謝緯(1916-1970)醫師，予人號做「台灣的 Schweitzer (史懷哲)」，是一位標準奉獻型的人格者，伊參王醫師全款是烏跤病患者的救命恩情人。檢采現此時的社會，知影謝緯醫師的人已經誠少，彼是因為伊 1970 年就來過身，佇世間干焦 54 冬的歲壽。其實，人的性命無論長短，要緊是會當活出光彩，一个人在生的時做人敢有四正，四枝釘仔釘落才知輸贏。1970 年 6 月 22，謝緯醫師的追思禮拜式堂頂，量約有 3000 个民眾自願來送伊行最後一程，教堂外的埕斗挨挨陣陣，其中，在生的時受伊照顧過的原住民佔有三分之一。五日前，謝緯醫師佇伊創設的埔里基督教病院工作規早起，中晝轉到厝裡，隨接手替換家後楊瓊英醫師，佇家己開的大同病院看診，食飽晝小眯(bi)一下了後，隨欲閣去二林共患者看病。伊離開牽手的最後一句話，原在猶是咧關心病人，的確是仁慈的醫者本色：「我愛佇兩點進前到二林。我若慢到一分鐘，病人就加受一分鐘的痛苦。我袂當予病人加受一分鐘的痛苦。」檢采因為謝緯醫師長期操勞過頭，心心念念攏是患者的身苦病疼，毋甘加開一分鐘管顧家己的健康，所致，1970 年 6 月 17 彼个氣候溫翕的下晡時，伊才會無張無持、無話無句，雄雄發生車厄意外來過身。

64 冬後的熟人暗頭仔，我佇日光燈皎，觀看 1945 年 11 月 17 謝緯儉楊瓊英佇日本翕的結婚相，毋管按怎看四角框裡的男女主角，對個面裡散發出來的氣質，絕對毋是干焦「查埔緣投、查某婿」這幾字會當說盡。因佇《謝緯和他的時代》

(謝大立著, 2001.4 人光) p15, 結婚相倒手月彼張閣較少年時陣翕的相, 對謝緯的眼神, 我干焦看出「堅定」兩字。

工作上很久沒來北門, 今天烏腳病以外有三個開刀, 以後若有會議不能來時, 需要變更時間, 盡量要來北門, 因為感覺這地方需要我。自從和孫牧師娘、王醫師合作這工作, 已經十年了, 社會對於烏腳病才漸漸有認識, 政府的援助, 無論建設方面, 醫藥補助方面也有進步, 我想上帝帶領讓我們經過最困難的時期了。

頂面是謝緯醫師 1970 年 1 月 29、過身進前五月日跤兜所寫的日記。對彼內面, 予人深深感受伊對北門嶼烏跤病患者致意的程度。事實上, 謝緯毋但是一位慈悲眾生的醫師, 同時, 伊嘛是一位信仰堅定的牧師。這對伊出身基督教家庭, 尚且, 閣佇台南神學院接受神學專業訓練的造就 tiōh 會當理解。佇台南神學院讀冊期間, 謝緯受史懷哲 (Albert Schweitzer, 1875-1965)、巴克禮 (Thomas Barclay, 1849-1935)、賀川豐彥 (Kagawa Toyohiko, 1888-1960) 遮的宣教師誠深的影響, 嘛為伊後來的信仰拍落不止仔在的根基。謝緯一生積極投入教會的事工, 重要的成就有: 促成「台灣教會青年團契」恰「台灣基督長老教會總會」的成立。雖罔, 伊在來做代誌只求犧牲奉獻, 毋捌想過為本身爭取任何的名聲、地位, 不而過, 上帝目睷看現現, 啥人真心付出總是袂走閃得, 1969 年 2 月, 謝緯終其尾猶是當選台灣基督長老教會總會第十六屆的議長。

論真, 謝緯有上蓋好的勢面, 會當當選南投縣長, 只要伊頷(tim)頭, 無論原住民抑是平地人, 濟濟人攏會頓票予伊, 彼个時陣無人的票聲會並伊較好, 毋過, 伊無致著大頭病, 拒絕名利的嗒弄, 專心一意佇牧會恰醫療的事工頂面。

1970 年 6 月 17 彼个氣候漚翕的下晡時, 謝緯醫師發生車厄過身的消息, 目矚仔久隨傳遍規个南投鎮。逐个人的心肝頭攏罩一重霧, 目屎四淋垂, 無為啥, 干焦因為謝緯是一位無私心、無顧一切犧牲奉獻的人格者。

伊的真愛, 的確會繼續流炭落去。

一代傳一代。

——2009.7.1 寫佇赤崁米街

2009.8.30 《台灣教會公報》3000 期

「公報 3000, 感恩無限」徵文台語組第三名